


**Pader Vigeli Berther OSB**

CR 1979, pag.361



Eis ei in siemi ni eis ei dira realitat? Venderdis, ils 30 da december 1977, allas 3 suentermiezdi essan nus aunc s'entupai sin claustra en tutta cordialitat per ina discurrida denter amitgs sco biaras gadas. Ti has giu grond plascher da nossa viseta che fuva quasi tradiziunala. Nus havein dau in paterlada da quei e da tschei ella stanza da recepziun ed essan lu serendi cull'entira famiglia en la stanza dils hospes per in caffé. En moda zun curteseivla ed amicabla has Ti demussau hospitalitat benedictina. Ti eis s'interessaus dalla famiglia, dalla veta professiunala, da nossas occupaziuns communablas, has relatau dalla veta claustral, da Tia parentella, da Tes panzieris pil romontsch. Ti has ofniau che Ti hagies luvrau pulitamein avonmiezdi vid la bilanza annuala dalla claustra, mo hagies lu pussau empauet suentermiezdi e selegries da puspei s'entupar cun vegls amitgs. Allas 16.15 has Ti rimnau la vischala per purtar ella sil plat da survir en cuschina. Avon has Ti aunc dau all'entira famiglia ina benedicziun zun persunala e biala. Jeu hai remarcau quei fatg ed engraziau cun plascher. Ti has surris ed eis sortius cun la vischala per serender en cuschina e returnar. Igl ei stau Tiu davos viadi en veta.

Ti havevas aunc fatg attents mei che Ti hagies ussa il numer dallas Annalas che jeu encurevel avon entgin temps. Perquei hai jeu cartiu che Ti seigies serendius en Tia carezada biblioteca romontscha. Frater Simon ha denton purtau en tutta agitaziun la tresta nova che pader Vigeli seigi daus afuns en cuschina e detti negins segns da veta pli. Tuttas emprovas da clamar en veta Tei ein stadas adumbatten. Cuort suenter han ils miedis curri neutier mo saviu constatar la mort, caschunada entras ina disdetga dil cor.

**Cuorta biografia**

Baseli Berther ei naschius ils 14 da settember 1911 a Rueras sco fegl da Gion Fidel Berther e da Maria Ursula Hendry. El era il cratsch dad ina famiglia purila da 10 affons. Memia baul piarda la famiglia numerosa il bab e quei ei adina ina frida che va afuns. Per la mumma munta quei dar damogn cun tut e procurar per in'existenza andanta als affons tut persula. «Aschia fa pader Vigeli gia baul l'experiencie scha che la veta ei buca mo ina spassegiada, mobein in luvrar e stentar cun ils talents e las forzas ch'il Segner ha dau.» (riug da bara da sur T. Berther). La famiglia Berther ha regalau treis clamadas spiritualas, sper pader Vigeli aunc sora Blanca Berther p.m. ad Ingenbohl e sora Maria Ursula Berther a Baldegg.

A caschun da nostra sentupada dils 30 da decembre ha pader Vigeli raquintau da ses fargliuns vivents e dils morts; ina sora (Maria Ursula Walder-Berther) vivi aunc oz a Surcuolm, in frar (Francesg Berther-Venzin) seigi a Rueras, ina muniessa (Maria Ursula Berther) a Baldegg ed el seigi il Benjamin. Ils biars da ses fargliuns seigien morts en consequenza d'ina disdetga dil cor. El sez sappi era dapi 10 onns (onn digl emprem infarct dil cor) co ei stetti cun el. «Ins lavura e fa quei ch'ins sa e cu il Segner cloma, lu van ins.» (T. Berther). '

Il di avon sia mort ha pader Vigeli aunc visitau siu frar e ses parents enta Rueras. Sco siu frar ha palesau al scribent da questas lingias hagi il defunct magliau da curascha gnocs, ina spisa da mur e savur indigena. El hagi lu aunc envidau siu frar per la «marianda», mo pader Vigeli hagi replicau: «Na, ju turna betga ple». Quei «na, jeu tuornel buca pli» di il Francesg, hagi occupau fetg el ed el hagi durmiu male e giu traso sco in stgir presentiment.

Pader Vigeli ha fatg il gimnasi a Mustér e Sarnen, profess ha el giu ils 15 d'october 1935 ed ei vegnius ordinaus spiritual ils 3 da zercladur 1939. Ils 30 da decembre 1977 ei il cuors dalla veta da pader Vigeli staus finius.

***Il pader benedictin***

En ses plaids da beinvegni als fideivels serimnai per la sepultura e d'engraziament al trapassau ha monsignur avat Victor puntuau la fideivladad alla communitad claustral, l'immensa premura, il grond spert da lavur da pader Vigeli. Avat Victor era a miu manegiar buca mo il superiur, mobein in amitg da pader Vigeli. Jeu sai sereguardar ch'ils dus conventuals fagevan gia avon 20 onns lur

spassegiadas, turs cun skis, turs da muntogna communablamein. Ual perquei vegn igl avat a ver fatg cun grev cor las funcziuns da bara per siu amitg.

### *Il magister da latin e romontsch*

Pader Vigeli ei staus professer da latin, romontsch e contabilitad. Jeu sai seregurdar fetg bein da nossas uras da latin. Entschiet veva ei cun pader Gregori, igl actual senior en claustra tenor profess. Ella tiarza classa ei pader Vigeli daventaus nies magister da latin. Il cuntrast ei staus gronds e la midada per biars empau da dolurusa. Pader Vigeli fuva in stregn scolast, cun disciplina da fier da lezzas uras. El era stregns cun sesez, haveva ina ferma voluntad e pretendeva era lavour entira da ses scolars. Ils verbs irregulars dall'Ars Latina, ils schinumnnai «communists» (perquei ch'els fuvan stampai cotschens) vegnevan scuos e scudi ch'ei siglieva brastgas. «Utschi maglia ni crappa», aschia pressapauc tunava sia devisa. Mo nus savevan vida tgei che nus fuvan e vein tratg nossas consequenzas, per nies bien. Pader Vigeli saveva bein latin, meinsvart schizun meglier che tudestg. Era ell'instrucziun da romontsch (che haveva liug da lezzas uras cumpletamein agl ur digl urari (17.30-18.00 duas gadas ad jamna) pretendeva pader Vigeli in bien ton, e tuttina era ei ina differenza denter quels dus roms. Nies professer da romontsch capeva cunzun da metter peisa sin la vart historica e cultural-historica e da far ina buna sintesa culla litteratura. Cheu sepaleisa la parentella spirtala da pader Vigeli Berther cun pader Baseli Berther (1858-1931). Pader Vigeli empruava cun inschign da far resortir il spert cultural romontsch e s'occupava meins dalla vart formala, linguistica. Per ils futurs academicchers pudeva quei valer, tonaton vessen ual quels saviu profitar formalmein en romontsch da lur formazion humanistica. - En la davosa classa havein nus giu contabilitad tier pader Vigeli. El che s'occupava dapi 1951 dil grond menaschi claustral e da sia bilanza, fuva senz'auter qualificaus dad instruir nus en quella materia. - Dils 1939-42 ei pader Vigeli viceprefect e da 1942-45 prefect.

### *Crosa empau dira, mo bien coc e cor sincer*

Pader Vigeli fuva in um grond, cun spatlas ladas, ina fatscha marcanta, in frunt ed in nas profilau, in ver pegr d'untgida. Jeu hai adina admirau el tschelau d'ina vart ses maununs, il pader cun ina detga braunca, da l'autra vart sia scartira fina ed eleganta sco quella d'ina secretaria. Pader Vigeli veva in'urdadira marcanta, ina cumparsa magari resoluta. Certins han forsa tratg conclusiuns fallidas da sia demanonza. A quels less jeu clamar cun Giachen Michel Nay en sia poesia Miu vtig nativ:

«Els ein ca gest dils pli mulai,  
ils umens da cuderas,  
essend els buc vid vons disai,  
vid cumpliments, caneras.  
Mo sils vischins sas sefidar  
sco sin in grep, sin in rempar.»

El lungatg romontsch vein nus d'ina vart l'expressiun «truffels en pelletscha ni truffels en mondura», da l'autra vart «far ora ni prender ora il cries u far ora la crosa». Cun quei fetschel jeu allusiun al fatg ch'ins sto saver differenziar tier pader Vigeli, forsa cunzun dils giuvens onns, la paratscha u la crosa dil coc u nuschegl. Jeu hai empriu d'enconuscher pader Vigeli sco um real, grad, sincer, fideivel ed aviert. Ins savess cuntinuar cun gest, loial, franc. El scheva zatgei agradora, alla grada, senza viarclas, senza metter si a sesez buccari. El fuva buca igl amatur da stgisas e pretexts, cunzun buca dalla faulsedad. Pader Vigeli era buc igl amitg dils tschatschers e paterluns, buc igl amitg dalla 'politica tschuffa', era buca da quella el moviment romontsch. El fuva enconuschents per enqual strihada, denton per tuccas e teccas beinmanegiontas, buca blessontas.

En ina da sias davosas notizias anfladas da avat Victor ha il defunct nudau il suandont: «Jeu engraziel a tuts superiurs e confrars per la grazia ch'els han accordau a mi da viver en la cuminsonza claustral. Sche jeu sun era staus mintgaton in «enfant terrible», hai jeu mai offendiu in u l'auter sapientivamein ed expressivamein. Jeu roghel tuts per perdun e la carezia da Cristus possi reunir nus tuts egl avegnir.» (Prelegiu el riug). Quels plaids sincers ed aviarts dil defunct plaidan per el e muntan per nus ina specia da testament.

### *Il luvrer nunstunclenteivel per la cultura romontscha*

Sper sia gronda activitat claustral e pastorala ei pader Vigeli Berther s'engaschaus cunzun per la caussa romontscha. En in necrolog ella Gasetta Romontscha s'auda ei da metter in ferm accent sin quei fatg.

Pader Vigeli ha entschiet a publicar per romontsch, sche jeu sbagliel buc, dils 1954 cun in artechel egl Ischi nr. 40 (1954) intitulaus «La claustra da Mustér e la Lumnezia». Gia dils 1938 era cumparida ella revista per la historia dalla baselgia ina contribuziun tudestga dedicada alla retscherca da «Sogn Glicci». Il Bündner Monatsblatt da 1939 ha cunteniu buca meins che 3 da sias lavurs, era quel da 1940 (La veneraziun da s. Victor da Tumegl), da 1954 (Habitadi benedictin en Lumnezia 1712-1755) e da 1956 (Administraturs da Rumein 1755-1955) cuntegnan lavurs da sia plema. P. Vigeli vegn ad esser staus intimaus da perscrutar l'historia da Rumein duront sia provisura da 1945-1951 en Lumnezia. Il Calender Romontsch da 1957 cuntegn igl artechel «Il sentir e patertgar dil pur muntagnard» cun ils suttetels: Senn per la famiglia, Il spert religius, La libertad. Il calender da 1959 ha purtau «Muntada dalla claustra», artechel integraus ella part tematica «Veta e cultura romontscha da 1859-1959», artechel che resplenda il patertgar religius, l'attaschonza e fideivladad a sia cara claustra. - Agl Ischi semestril, annada 60, nr. 4 (1975) ha il defunct surdau la contribuziun «Giachen Martin Hendry, in emigrant d'avon varga 100 onns ell'America». - Igl emprem cudisch pil scalem superiur da La veta da mintgadi (1973) fa enconuschents nus cun il bibliotecari ed archivar ella contribuziun «Aventuras d'in miuret». Il secund cudischet pil scalem superiur (1975) dalla medema ediziun porta ina translaziun d'in toc original dad Edith Piaf: Miu uffiern, il tissi enivront.

Las Annalas da 1969 (nr. 82) cuntegn ina contribuziun zun instructiva e bein documentada: «Pader Placi a Spescha e ses priedis». Ellas Annalas figurescha pader Vigeli aunc en in auter liug. El ha numnadamein cumpilau il register general dil calender «Il Glogn» 1925-1953 e publicau quel en las Annalas 78 (1965), squetsch separau ch'ins sa aunc retrer dalla Ligia Romontscha e che presta survetschs zun nizeivels. - A sia parentella ha pader Vigeli bein fatg in dils megliers regals, surdond la «Genealogia della famiglia Gion Fidel Berther-Hendry, Rueras, 1972» in'ovra zun appreziada.

Duront biars onns ei pader Vigeli staus promotur dall'academia romontscha «Il Curtgin». Il sribent da questas lingias ei staus actuar e president dil Curtgin e sa attestar ch'il defunct ei adina staus promts cun plaid e cussegli per sustener nossa uniun studentica romontscha dalla claustra. - Pader Vigeli ei staus in commember activ e fideivel dalla Romania. El fuva per aschidadir il «delegau ufficial romontsch dalla venerabla claustra da Mustér» alla Romania ed alla Ligia Romontscha. Aunc da s. Stiafen 1977 eis el staus presents alla radunanza da delegai dalla Romania ad Uors e quei tochen alla fin d'ina tschentada da 4 uras. El ha cheutras documentau danovamein igl interess demussau gia cun sias contribuziuns els organs dalla Romania. - Pader Vigeli ei staus ella cumissiun per l'ediziun dil vocabulari romontsch sursilvan-tudestg da 1962. Cheu ha el saviu dar bunas informaziuns e pacificar mintgaton ils tgaus calirai. - Il defunct representava la scola media da Mustér en la conferenza da magisters da romontsch dallas scolas medias. Meinsvart era el cheu pli gigins e pli realists che ses collegas pli giuvens. - Pader Vigeli ei staus in collaboratur fetg appreziav e fidau dalla Gazzetta Romontscha e dil Calender Romontsch. Ses temas preferi fuvan da tempra historica, locala (tuatschina), cultural-historica e claustral.

### *Il redactur dil Pelegrin*

Il schaner 1958 ha pader Vigeli surpriu la redacziun dil Pelegrin ed ha redigiu quel cun grond talent e talien tochen 1968. «Pader Vigeli capescha da tractar el Pelegrin damondas actualas dalla veta, da famiglia, scola e baselgia». (T. Berther). El engrondescha il diember dils collaboraturs, tacca temas pli moderns che fuvan stai plitost tabu tochen da cheu. El ha il cletg da posseder biars e fideivels colluvrers. Pader Vigeli ei in redactur nunstuncienteivel. Denter auter translatescha el ovras dil franzos, dil tudestg: Albert Seipolt (benedictin dalla Baviera) «La zanur dalla pleiv, In vicari e treis mattauns, Era ina femna sa gidar alla victoria», da Leo Tolstoi: «Tgei mantegn il carstgaun en veta?», da Maria Ebner-Eschenbach: «Crambambuli», da Caspar Freuler: Il cunti dil moni mellen. Il redactur fa alla fin da scadina annada in register dallas materias, el s'occupescha da problems da nossa populaziun.

Igl onn 1967, cura che pader Vigeli sesanflava el spital en consequenza d'in infarct dil cor (el sesenteva buca bein, ei vegnius cul tren a Glion, zuppegiaus or el spital ed il miedi ha constatau ch'il pazient hagi ual varghentau in infarct!) vevan las tgirunzas e soras buca bialaveta da tener en letg e da far ruassar il bien pader. Siu panzieri principal fuva la redacziun dil Pelegrin e buca sia sanadad; ina maschina da scriver ha stuiu neu ualts spert! Sur T. Berther ha exprimiut fetg bein la tenuta dil defunct en siu riug: «Il miedi admoneva el d'haver quita e seschanegiar. Denton seschanegiar, quei enconuscheva pader Vigeli buc».

### *Il custos della biblioteca romontscha claustral*

Dapi 1952 ha pader Vigeli Berther cuntuau cun grond inschign la laver dil fundatur dalla biblioteca romontscha, pader Baseli Berther (1858-1931) e da ses successors, pader Ursicin Simeon (1866-1950) e pader Ambros Widmer. Pader Vigeli ha informau en in'emissiun dil Radioscola sur dalla biblioteca romontscha dalla claustra. Cu el hagi entschiet fuvien las crunas aunc miez vitas. Cun carezia, mo era cun egl tut special ha pader Vigeli capiu da fastisar, rimnar, cumpletar ed ordinar manuscrets, purgameinas, scartiras veglias, cudischs, gasettas, fegls sguolonts ed auter. Mintga 'trapla' vegneva urentada, rimnada ed arcunada: annunzias da naschientscha, hartas da morts (memorias), da messas nuvialas, da nozzas, giugs etc. Pader Vigeli ha luvrau e barhau per sia biblioteca cun in engaschament endinau, cun tgierp ed olma. Igl autur da quei necrolog ha giu la cuida e l'honur dad esser siu assistent en biblioteca duront plirs onns. El sa confirmar che pader Vigeli sesenteva cheu en siu element; la biblioteca romontscha fuva veramein sia «gronda piissiu», mo ina buna. Cheu tarlischavan ses eglis da furbaz, cheu scheva el meinsvart cun in surrir malizius: «Enquera, mo enquera, ti vegns ad anflar!» (Ed jeu hai priu a pez sia admoniziun ed hai profitau da quella piissiu). Sia biblioteca romontscha astga valer per la pli impurtonta e completa biblioteca romontscha, silmeins per la part sursilvana, cunzun grazia a sia premura da furnicla.

Avon entgins onns ha pader Vigeli visitau in per da mias classas al Seminari scolastic. El ha presentau a nus sia ovra da veta, sia carezada biblioteca romontscha. Il bibliotecari ha giu in auditori fetg interessau. Cun differentas classas havein nus astgau admirar la biblioteca romontscha sin claustra. Pader Vigeli haveva per disa da mussar il pli grond cudisch romontsch (sursilvan), La s. Bibla (tut la sontga Scartira) da Stefan Gabriel (il giuven) e da Luci Gabriel da 1717-1719. Silla cuviarta da lenn da quella bibla fuva in text che pader Vigeli prelegeva mintgamai cun plascher, screts cun letras grecas, mo en lungatg tudestg: «Jeu vegnel mai pli a beiber in sulet daguot en mia veta». Pader Vigeli scheva cun in rir malizius: Quei sto esser stau in um che veva tema dalla dunna, in bugliaiatg, perquei ha el secret cun letras grecas ses propiests, per che la dunna sappi buca leger e controllar. (Ei dess forsa aunc autras interpretaziuns).

Il custos della biblioteca fuva senz'auter promts da brattar cudischs: «Jeu brattel adina, sche jeu hai dublettas avunda, mo jeu vendel mai, per raps dun jeu nuot». Era quei bien principi ha enqual da ses fideivels discipels acceptau e praticau cun success. - Essend pader Vigeli bibliotecari romontsch dalla claustra eis el vegnius eligius - era cul sutsignau - en la cumissiun per la nova Bibliografia retoromontscha. Cheu ha el prestau gronda e buna laver e dau beinenqual cussegli che sebasava sin liunga experienza. - En «Aventuras d'in miuret» en la Veta da mintgadi descriva il bibliotecari pader Vigeli la biblioteca romontscha sco suonda: «Gia vesa il miuret tras ina fessa viaden egl arcun che cuntegn historia e sabientscha, letezia e tristezia, veta e mort da tschentaners e tschentaners. - Cheu schai in codex sin l'auter, cudischuns ligiai en curom e pergameinas e serrai cun fiblas e fivialas. Dasperas paradeschan en bi disuorden (!) fegls sguolonts, documents che relatan da dis d'armas e larmas, da lavinas e pupiras, mo era da fiastas e sulazs».

### *El survetsch dalla pastoraziun*

Sco gia menziunau ei pader Vigeli staus da 1945-51 beneficiat da Rumein e provisur da Vignogn. Sur Tumasch Berther ha dau il suandont maletg dalla laver pastorala dil pader defunct: «Sper il grond pensum da laver en claustra va el dumengias e fiastas viado en las pleivs per gidar en la pastoraziun. Nus prendein forsa che quei secapeschi da sesez. Nus stuein denton patertgar che gest ils dis sco Nadal e Pastgas, cu in pader che dat scola havess - suenter in trimester da strengta laver - basegns da ruaus, tucca ei ad el dad ir en ina pleiv e prestar gronda laver, e seguir tuorna el a casa fetg stauchels. Per quei survetsch pastoral che pader Vigeli ha prestau quels biars onns en nossas pleivs mereta el da spirituels e pievel in sincer engraziamenti. Il Segner vegli dar ad el la bein meritada pagaglia».

Aunc sur il davos firaus da Nadal fuva pader Vigeli staus - sco avon in onn - a Falera per prestar cheu il survetsch pastoral. Da Nadal ha el fatg in priedi da cuntegn veramein impressiunont e plein slontsch. Ei vegn ad esser stau il davos. Ses plaids plidai da cor ein i a cor; els han schau percorscher ch'in um profundamein religius e pietus sespruava da guidagnar ils fideivels pil Segner.

Pader Vigeli valeva per in bien predicator; ses priedis romontschs da Nossadunna pil meins da matg en claustra ein aunc en buna memoria. La baselgia claustrala fuva mintgamai fullanada. Cheu encurschevan ins che il defunct fuva encounter tut chichergnem dultschin religius, encounter tutta «sentimentalitad da femnas veglias». El haveva in pulit pezzi senn per humor e scheva magari: «In sogn trest ei veramein in trest sogn», ni «Mo buca prender il mund si dies, il mund po tener

maneivlamein Vus, mo Vus buc il mund». - Pader Vigeli leva buca schar percorscher entras sia tenuta exteriura sia religiusadad interna. El saveva che mo Niessegner hagi da vegnir aduraus e glorificaus, el evitava scadina veneraziun ch'udeva buc ad in vivent, el saveva ch'igl entscheins s'audi a Niessegner e buca agl augsegner.

#### *Sur fossa*

Car amitg, pader Vigeli. Ti eis ius e lais anavos ina gronda largia. La claustra, Tes parents, il pievel romontsch deploreschan quella sperdita. Jeu hai pers in bien amitg e fideivel collega, in cussegliader experimentau ed aunc bia dapli. Ti vegns a muncar a biars en beinenqual situaziun. La claustra vegg ad haver grondas difficultads da serrar quella largia. Ti fuvas gie il pli giuven pader d'origin romontsch. Il fatg ch'ils dus auters paders romontschs han gia varghentau ils 70 vegn a far quitaus a monsignur avat.

Nus lein denton buca renfatschar a Diu ch'el ha priu da nus pader Vigeli, relativamein baul tenor giudicat human e quei ordamiez ina veta plein travaglia. Nus lein biaronz engraziar a Diu ch'el ha regalau a nus duront quei temps in aschi bien pader e luvrer premurau e cunscient digl agen duer. Persunalmein admettel jeu il meglier engraziamet per tut quei che nossa amicezia da 20 onns ha cumpigliau.

Claustra, decanat, confrars, amitgs, students anteriurs ed activs ed igl entir pievel romontsch din a Ti persuenter in cauld e resentiu Dieus paghi. Vegli il Segner remunerar quei premurau e fideivel luvrer tschiendublamein. Nies bien pader Vigeli Berther ruaussi enten il Segner!

Isidor Winzap

13-2-78

## Sepultura da rev. pader Vigeli Berther OSB

(Corr.) Gliendisdis vargau, ils 2 da schaner 1978, ha in conduct da bara impressiunont rendiu la davosa honor ad in zun meriteivel e bien conventional dalla claustra da Mustér: pader Vigeli Berther. El ei vegnius clamaus tiel Segner, cu il temps d'advent ei staus alla fin, per la fiesta dalla sontga Famiglia, encounter sera dils 30 da december. L'ura dalla mort ei bein arrivada «tut surura, denton buca dil tut nunspitgadamein per pader Vigeli. Haveva el gie avon 10 onns giu in infarct dil cor e dapi lu saveva el ch'el seigi in signau, e che la davosa ura savess esser cheu tuttenina.» Aschia ei rev. sur Tumasch Berther, plevon da Falera, s'exprimiis en siu dign e conforteivel riug da bara. El ha skizzau la veta dil defunct e sia prestazion en claustra, ella pastoraziun, per la scola e sin camp romontsch. — Monsignur avat Victor Schönbächler, che ha celebrau la messa da bara, ha fatg resortir ils merets e las qualitads dil trapassau ed ha engraziau ad el sur la fossa per sia premura nunstundenteivla, siu engaschament endinau e sia fideivladad enviers la claustra.

La baselgia claustral era fullanada, bia glieud stueva aunc star sin peis. La parentella da Rueras e Tujetsch e d'autro era cumparida numerusamein. Gia da Daniev eran las famiglias parentadas en malencurada serendidas ella caplutta da morts alla bara da pader Vigeli per urar per lur car parent. Pliras uniuns ufficialas (Regenza, canzlia cantunala, Ligia Romontscha, Romania, Radio e televisiun romontscha) e la vischnaunca da Vignogn, nua che pader Vigeli era

status provisur da 1945–1951, eran delegadas. Biars students actuals ed anteriurs, in pievel zun numerus da fideivels da lunsch e da maneivel ha vuliu documentar entras sia preschientscha sia engrazieivladad ed attaschonza al car defunct.

Gia l'entrada dils ca. 30 conventionals e confrars cun monsignur avat tras la nav emplenida da fideivels e la gronda concelebraziun han relaschau in'impressiun cuzzonta. Igl ei bein in confess che la mort ei buca la fin, mobein l'entschatta dalla veta, la vegnida spitgada duront igl advent. Il cant choral, cantaus dils paders, fraters ed augségners el chor ha fatg gizzar las ureglas. El ei semischedaus da temps en temps cul cant dil pievel. Ils fideivels han festivau eucaristia en undrientscha dil defunct, han retschiert la tschavera pascala en grondas roschas.

Quella messa da bara ha giu in aspect linguistic characteristic. Ils responsabells per ils funerals, cunzun il pader hospiton, Ambros Widmer, han capiu da dar a quella sepultura il bul dalla trilinguitad (romontsch, tudesch, latin). La messa ei stada tudescha e latina, il riug preponderontamens romontschs e sin fossa han ins recitau il paternies romontsch.

Dil past da bara el refectori dil students han ca. 180 persunas priu part. A tuts quels che han accumpaignau il bien, premurau e sincer pader Vigeli Berther alla fossa ni han collaborau en ina moda ni l'autra al dign survetsch da sepultura s'auda in engraziament resentiu. Il car defunct ru aussi en la pasch dil Segner.

(In necrolog pli detagliau suonda)

IW